

nus inserere systemati meo, quod nequeo non visa planta, cum toties elusus fui.

Item noli delineare *Hieracium* istud inter Tuas, antequam hoc coluisti per annum in horto. Vidi duas plantas in hortis i. e. extra alpes, sic mutasse faciem, ut jurares diversas.

Tota hac aestate occupatus fui in *Cap. b. spei plantis*. bone Deus, quam mira et singularia, accepi inde plus mille species.

*Psoraleam* raptim dicebam ultimo missam plantam, sed est Indigofera, re melius examinata.

*Dickia* aut erit monstrum, aut eodem modo dehiscit ut *Phryma capensis*.

Vale . d. 15. Sept. 1773.

## 72.

Vir amplissime!

R. ad literas 25. Septembr.

*Euphorbia maculata* 186 Tua; etiam mea.

*Euphorbia canescens* Tua, etiam mea est.

*Euphorbia hypericifolia* Tua, mihi *Euphorbia parviflora*.

*Crotalaria* missa est *Crotalaria incana* mihi.

Nuper accepi *Lythrum carthaginense* Tuum, pulchra planta est. Semina Evonymi verrucosi erant exoptatissima, gratias habe.

Gentianae ciliatae specimina possideo ex Europa australi, Sibiria, America septemtrionali et Islandia a Koenigio, et puto esse meras varietates. Tuum est facere pro lubitu.

Bryoniam baccis rubris vidi copiose et examinavi, certe vidi mares et feminas dioicas, vidi et nisi monoicas androgynas s. monoicas in Belgio.